

Zakkenrollers

- Cees: Moi, inspecteur.
- Inspecteur: Moi, mien jong, doar bist ja al weer.
- Cees: Joa, ik von t wel weer tied worden om es even bie joe op veziede te goan.
- Inspecteur: Mor eh wat vonden dien lezers van t veurege stokje. Over Pieter Braauwer.
- Cees: Meroakel.
- Inspecteur: Echt woar?
- Cees: Ik heb haile veul reaksies had. Minsen zeden al , doe moust nog es n keer bie inspecteur Panjer Pinkster op bezuik goan.
- Inspecteur: Kovvie?
- Cees: Lekker.
- Inspecteur: Wat hest doar bie die?
- Cees: n Kraante.
- Inspecteur: Wolst mie wat veurlezen of wolst n verhoaltje van mie heuren.
- Cees: Baaide. Ik wol joe noamelk n stokje oet kraante veurlezen over geheim plietsiewaark en es vroagen wat joe doar van vinden.
- Inspecteur: Ik heb gain gehaimen, Cees. As ik, as plietsieagent, wat dou, den stoa ik doarveur.
- Cees: Dat snap ik, mor dat bedoul ik nait. Tegenswoordeg hest noamelk minsen, dij aander minsen in de goaten holden om op dij menaier misdrieven te veurkommen. Dat nuimst mit n stoer woord: profilers.
- Inspecteur: Nooit van heurd, mor doar huifst nait zo'n laank verhoal van te moaken. Haarst mie toch ook gewoon vroagen kind. Inspecteur, hebben ie wel es n misdrief waiten te veurkommen?
- Cees: ?????
- Inspecteur: Joa, Kees. Kiek mor es even op dien neuze. Dat heurt bie t plietsiewaark. Hou smoakt de kovvie.
- Cees: Goud, mor vertel.
- Inspecteur: Joaren leden wuien wie op t dörp hailemoal gek van n zakkenroller. Zo'n googeloar, dij minsen ongemaarkt van alles oet de buutsen toverde. Joa, kiek mor verboasd. Toverde. Der was nooit aine, dij markt het, dat e zien porreffullie of porremonnee kwiet was. Joa, ast op betoalen aan kwam.
- Cees: Hou hebben je dat den aanpakt.
- Inspecteur: Hiermit, mien jong. Koppie, koppie.
- Cees: O?
- Inspecteur: Kist wel noagoan, dat juist dij op steeën, woar t gewoon is n porremonnee te trekken de maiste klachten votkwamen.
- Cees: In n winkel.
- Inspecteur: In de kroug.
- Cees: In de kroug?
- Inspecteur: Snapst dat nait? Doar binnen lu soms, voak wat minder oplettend.
- Cees: Te slok.
- Inspecteur: Joa, persies, as der te veul draank deur de slokdaarm gaait, den worden minsen te slok.
- Mor nou dust al weer, moust mie nait aal in de redevoeren roaken.
- Cees: Ie zaten in de kroug.
- Inspecteur: Incognietsio. Kist doar ja nait mit goud fesoun in dien uniförm goan zitten. Den het elkenain deur, dat t deurstoken koart is.
- Cees: Ie zaten doar dus in joen beste pak.
- Inspecteur: Joa, t mout natuurlek wel wat lieken.
- Cees: Mor in joen zundoagse pak binnen ie nog aaltied Panjer Pinkster.
- Inspecteur: Dat dochst zeker. Ik haar mien snorre omhoogkruld en n dikke fokke op de neuze zet.

Nee, der zol gainaine zeggen, dat ik inspecteur Panjer Pinkster was.

Cees: En dou gebeurde t.

Inspecteur: Wat?

Cees: Ie hebben de doader, de zakkenroller in de kroage pakt en mitnomen noar t plietsiebero.

Inspecteur: Nee.

Cees: Hou kwam dat den zo?

Inspecteur: Ik haar der al n uurtje of wat zeten. t Was oardeg drok, mor de maisten waren wel bekinde lu van t dörp. Doar huifde ik dus nait zo op te letten. t Waren meer de onbekinden woar ik mien aandacht op richtte.

Cees: Da's n duudleke zaak.

Inspecteur: Mor kist doar ook nait goan zitten en niks verteren. Dat vaalt ook op.

Cees: Ik snapt.

Inspecteur: En ieder moal as d'ober bie mien toaveltje kwam om der n konjakkie of n borreltje hin te zetten, den vruig e, zo even tussen neus en lippen deur, of'k al biet haar.

Cees: Mor gain dikke vis.

Inspecteur: Hou waist doe dat nou weer.

Cees: Ik roa ook mor wat in t wilde weg.

Inspecteur: Luuster. Dou Knelis en zien vraauw tegen vief uur smiddoags òfreken wollen, was Laiden in last.

Cees: Knelis?

Inspecteur: Nee, zien vraauw, dij gilde d'haile zaak bie mekoar en toerloos achter mekoar deur: Ik bin mien porremonnee kwiet.

Cees: En wat hebben ie dou doan?

Inspecteur: Ik heb dou votdoadelk mien fokke ofreten, 'k zag toch hoast niks deur dij dikke gloazen en bin dou noar Knelis en de vraauw stapt.

Cees: En joen vermommen?

Inspecteur: Dat haar nou ja toch gain zin meer.

Cees: En de doader kon n mooi feestje baauwen.

Inspecteur: Doar snap ik ja niks van.

Cees: Knelis Bakker is n dikke boer en zien vraauw haar vast n dikke porremonnee bie zok.

Inspecteur: Wie hebben t doar nait over had.

Cees: De doader was dus ontsnapt.

Inspecteur: Evenpies.

Cees: Evenpies?

Inspecteur: De slager het hom dijzulfde middag nog achter n dichte deure van zien bienoa lege koelvak opbewoord.

Cees: Leg mie dat es oet.

Inspecteur: Hail simpel, mien jong. De filaine zakkenroller het dus, weschienlek net dou ik even nait keken heb, dij olde gladjanus, zien slag sloagen en het de porremonnee van vraauw Bakker rold. En het docht, dat goa ik even vieren en op weg noar hoes is e bie d'slager aangoan en het doar twij leverworsten, n stok of wat dreuge worsten en nog wat gehaktbalen besteld. En nou komt t. Dou t op betoalen aankwam het e de porremonnee van vraauw Bakker teveurschien hoald.

Cees: Joa en ?

Inspecteur: n Slager kin aal zien klanten. Wait persies, wat ze ín de porremonnee hebben, mor wait ook hou ze der oetzain.

Cees: En dou was ain telefoontje noar joe genog.

Inspecteur: Ahum ... nee. Ik was dij middag nait meer zo best op de bainen. Traauwens de zakkenroller ook nait, heur. Dij haar ook wat muite mit lopen, weschienlek deur de kolle in de koelkaaste. Tenminnent, dat heb ik begrepen van Tönnies, mien traauwe linker- en rechterhaand.

Cees: Nou, inspecteur, bedankt veur joen verhaal en tot n volgende keer.